

16 JAN 1999

PARA PEMIMPIN BN SABAH TEMUI PERDANA MENTERI

KUALA LUMPUR, 16 Jan (Bernama) -- Para pemimpin Barisan Nasional (BN) Sabah mengakhiri pertemuan mereka dengan Perdana Menteri Datuk Seri Dr Mahathir di sini hari ini dengan kebanyakan mereka memilih untuk tidak berkata apa-apa mengenai persoalan pilihan raya negeri.

Perjumpaan di Jabatan Perdana Menteri itu bermula kira-kira pukul 9 pagi dan kereta yang membawa Ketua Menteri dan Pengerusi BN Sabah Tan Sri Bernard Dompok dilihat meninggalkan tempat itu satu jam setengah kemudian diikuti dengan para pemimpin lain.

Kebanyakan mereka tidak memberhentikan kereta mereka untuk menjawab soalan pemberita yang menunggu di pintu pagar. Beberapa orang yang berhenti tidak menjawab sepenuhnya.

Presiden Parti Progresif Sabah (SAPP) Datuk Yong Teck Lee berkata terserah kepada pengerusi BN Sabah untuk memberikan penerangan mengenai hasil pertemuan itu dan kesemua sembilan pemimpin parti komponen turut hadir.

Presiden Parti Bersatu Rakyat Sabah (PBRS) Datuk Joseph Kurup berkata mereka membincangkan mengenai politik dan pelaksanaan projek-projek di Sabah.

Semasa ditanya mengenai tarikh pilihan raya: "Kamu sepatutnya tanya Ketua Menteri."

Turut hadir pada perjumpaan itu ialah Setiausaha Agung BN Datuk Mohamed Rahmat.

Tempoh penggal Dewan Undangan Negeri sekarang berakhir 18 Mac ini.

Sementara itu di KOTA KINABALU, Pengerusi Badan Perhubungan Umno negeri Datuk Osu Sukam berkata semua pemimpin BN negeri yang menghadiri perjumpaan dengan Dr Mahathir itu telah diberi gambaran kasar mengenai tarikh pilihan raya negeri.

Mereka juga berpuashati dengan perbincangan mengenai pengagihan kerusi di antara parti-parti komponen.

Pemimpin lain yang hadir pada perjumpaan itu ialah Presiden Angkatan Keadilan Rakyat (Akar) Datuk Pandikar Amin Mulia, Presiden Parti Liberal Demokratik (LDP) Datuk Chong Kah Kiat, Pengerusi MCA Sabah Datuk Chau Tet On, Pemangku Pengerusi Gerakan Sabah Tan Sri Soon Siew Hong dan Pengerusi MIC Sabah V. Jothi.

-- BERNAMA

JS RON